



望想

藥房官開門，店面前斯排緊長長個人龍咧，路項个車一臺一臺咻緊過，路脣个人一個接一個恬恬靜靜排列，生趣个對比畫面分人疑狐，該兜毛白白个老阿公、老阿婆、面頰卵紅霞紅霞个細阿姊、武頓砸礮个後生人……厥等乖乖企緊，到底在該排麼个？等麼个？係大人物个紅包？係紀念品？抑係香噴噴个雞排、卵塔？等到藥房个鐵門捲上去，著一身白个護理師出來發號碼牌正知，係等領嘴揞哦！無人搶也無人出聲怨怪，時間一到，照順序輪緊入藥房，出來該下，逐個手項都地核信絡眉開目笑，厥等地著望想咧！滿足个心情表現在面項，手項个信絡像閻羅王个免死牌樣，恤著這層，手斯撈越致緬咧！

看電視報導，這波全球性个肺炎疫情，目前看起來係無收煞个勢面，慘个係還有緊遛緊闊个感覺。疫情係嚴重、係得人驚，毋過連續劇樣个生活還係愛過落去，毋知危險在哪、驚分人遛著，比較起來屋家還係安全所在，斯恁泥，餐廳个生理日見日壞，本錢貢个，閒去捉蚊硬撐，錢水毋足个斯早早收撤，另外謀出路。非常時期，阿姆係屋家人个靠山，得人惜个阿姆功能盡出，手路盡展，一早斯戴核排列買來个嘴揞去市場，割豬肉、買鯊魚，青菜愛現摘、果子擇當季……，算盤杓了杓，斯想用盡少个錢買來歸屋人个望想。暗晡頭，飯桌項个燒氣，一屋人滿意个笑容，斯係慇懃阿姆个望想。

病毒還已遽，防疫个工夫做搞毋得，高不將學校延期開學，一擲後，爺哀頭那疾咧，細人毋係貓、狗，跔佢毋核，總愛恁兜頭路畀做，遊樂園去毋得，夜市、賣場、百貨公司也兼身毋得，仰結煞呢？對倉庫肚搨出生塵打灰个跳索、滑板，輪凹凹个鐵馬、無風个籃球，該得嘮風个嘮風，摔金个摔金，像雞嫫帶雞子樣，哪項人少斯對哪去。潭雅神自行車道、打早个運動公園、旱溪人行步道、跋山……，和掇个氣氛、鬆爽个感受，像經過幾下個老頭擺樣，又轉到身項來咧！踏出鳥籠樣个屋家，天地係開闊个，你使得體會該「吹面不寒楊柳風」个風个溫柔，欣賞樹頂新綻出嫩葉个油光，花開像人，各各有佢特殊个香氣、氣質；花謝打子，係生命个傳承，蟲鳴鳥叫，唱出春天个交響曲，看哪！禾田虛玄个倒影，斯係人生，分風牽起个波紋係一圈一圈个愁慮事，風會過、水會平，關關難過關關過，配合、做好防疫工作，愁麼个！

圳溝水潑啊潑，急急拚往下，三月過撇四月跔核過。景氣毋好係暫時，錢銀少賺，多出親情也已好，千萬毋好兩片輪恹恹。行入大自然，同天地交陪，你斯會知得下一步愛仰脣行！

作者：劉玉蕉

☆詞彙學習☆

【望想】mong` siong`：期盼、盼望。

【嘴揞】zhoi` em+：口罩。

【信絡】sin` log`：信封袋。

【越致】rhed` zhi`：更加。

【勢面】shi` mien`：樣子；情況。

【杓了杓】diag` liau` diag`：再三盤算。

【做搞毋得】zo` gau` m` ded`：不可兒戲。

【擲後】bang+ heu`：延後。

【摔金】cud` gim+：擦亮。

【虛玄】hi+ hien`：不真實。

【拚往下】biang` gong+ ha+：急急往下奔流。

【交陪】gau+ pui`：溝通、交流。